

Ekwo-ozì, Pòlu Deru Nù Ndu Filipayi

1 ¹Ọo mbèdua, bụ Pòlu; mu lẹ Timoti, bụ ndu l'ejeru Kéreshi Jizọsu ozi l'ede ekwo-ozì-a anụ ndu-nsọ ono, bu lẹ Filipayi g'ẹphe hakọta; mbụ ndu ono, ẹphe lẹ Kéreshi tųgaru buru nanụ. Anyi edekwa iya phọ anụ ndu-ishi Chịochi pẹ mẹ ndu ejeru Chịochi ozi.

²Gẹ Chileke, bụ Nna anyi; mẹ Nnajiuphu, bụ Jizọsu Kéreshi meeru unu eze-iphe-ọma; mekwaaphọ g'unu buru l'ẹhu-guu.

Pòlu epfu anụ Chileke l'opfu ẹhu ndu Filipayi

³Mu ekeleje Chileke mu ekele iphe, bukọọ teke mu ritaru unu. ⁴Teke-nteke, mu epfukpọọ opfu ẹhu unu g'unu ha anụ Chileke bẹ mu egudeje ẹhu-utso epfu iya. ⁵Noo kẹle e -shi kẹ mbọku mbụ ono, unu nọmaru ozi-ọma kẹ Kéreshi ono bẹ unu shiẹpho e -shi teke ono eyeru mu ẹka l'anọdu asa ozi-ọma ono asasa g'a nọma-dzuru gbiriri jeye nta. ⁶Iphe lanụ, mu ka akọta ọhu bụ lẹ Chileke ono, bụ iya bụ onye wataru eme iphe-ọma ono l'ẹhu unu ono bẹ l'e-gudeẹpho nno eme jeye teke oo-mefufu iya l'ishi lẹ mbọku ono, Kéreshi Jizọsu a-bya ono. ⁷Noo ẹgube ọriri, mu arijeru unu bụ ono; kẹle ọọ iphe, gbaru mu l'ememe; eshinu unu nọ mu l'ọkpoma. Noo kẹle g'unu ha bẹ anyi l'unu tųkoru gbaru mgba l'eze-iphe-ọma ono, Chileke meru mu ono. Mu nọ lẹ mkpọro nta-a; anyi l'unu tųkokwapho gbaru mgba l'eze-iphe-ọma k'agbaru ozi-ọma ono ọdzori; bya agbakwarupho mgba l'eze-iphe-ọma k'anọdu eme iya g'o shihu ike. ⁸Su-a; ọ kwa Chileke bẹ bụ onye maru l'ọọ ọkpobe-opfu bẹ mu epfu sụ l'oghoroko unu g'unu ha dụ mu shii; ono buru n-yemobu ophu shi l'ẹka Kéreshi Jizọsu.

⁹Iphe, mu anọduje epfu anụ Chileke bụ g'o mee g'obu ono, unu yeru nwibe unu ono nọdu akaẹpho shii eje; wakwaphọ g'unu kabaa amaru Chileke ọkpobe amaru; mẹ g'unu dụ ike marwetajẹ iphe, gbaru unu l'eme-me. ¹⁰Ọo ya bụ g'unu aduje ike hotajẹ iphe, ka ree mee; k'ọphu bukwanu mbọku ono, Kéreshi e-kpe ndiphe ikpe ono rwuẹpho; oolewarọ l'unu doberu onwunu ọrù; ọ tọ duedu iphe, ọọ-ta unu ụta iya; ¹¹elekwaphọ

l'umere, unu shikpoo meta le ndzu unu l'ophu bukota umere, pfuru oto, shi Jizosu Kereshi l'eka; umere l'e-me ge ndiphe kwabe Chileke ubvu; jaa ya ajaja.

Egude ndzu onye egoshi l'a no-doru Kereshi

¹² Unwunna mu; iphe, mu eme g'unu maru bu l'iphe ono, dapfutaru mu nu ono be gbeyetabakwaanu eka g'ozima ono kabaanu edzuru mgboko. ¹³ Noo kele iphe, bukotakpoo ndu ojogu, eche nche l'ibe onye eze; mewaroro iphe, bu ndu ozo be tukowaru makotaru nta-a l'oo le mu ejeru Kereshi ozi be meru g'o gude a tua mu mkporo. ¹⁴ Nta-a be mkporo-a, a turu mu-a mekwaru; ikpoto unwunna, anyi l'ephe kweru ke Kereshi tukowaa buru ndu obu kabawaa eshihu ike; k'ophu ephe kabaa asa ozi-oma ono kpaakpa; ophu o dudu onye ephe atsu ebvu.

¹⁵ A makwaru-a l'o nweru ndu gude enya-pfurupfuru ezi ozi-oma ke Kereshi obu; mbu ndu ezi iya nu g'iphe, eeme l'opfu; ole o nwekwaru-a ndu ophu gude obu iphoro ezi iya. ¹⁶ Ndu k'ono, gude obu iphoro ezi iya ono be ezi iya nu; opfu l'ephe yeru Kereshi obu. Noo kele ephe maru l'oo ya be kuru mu ge mu bya agbajeru ozi-oma ono odzori. ¹⁷ O be le ndu ophu ezi iya nu g'o bu iphe, eme l'opfu pho; egudedu obu phe ezi iya ono; bu iphe, ephe emelepho bu g'iphe-ehuka-a, mu eje le mkporo-a, mu no-a kabaa shii.

¹⁸ Ole o bu; ?mu eyekwanuru phe onu? Mbu-a; ?e gude obu iphoro epfu iya-o; ?o bu l'o nweru iphe, ndu epfu iya nu vu l'uche epfu iya-o; iphe, o bu; iphe, o bu; g'e pfu iya nu mee g'opfu eh Kereshi ono jedzuru mgboko. O kwa iphe ono e-me g'ehu tso mu utso. Mbukwa eh je anodukwaro atsowa mu ro nno. ¹⁹ Kele mu maru l'eshinu unu anoduje epfu anuru mu Chileke; teme Unme Jizosu Kereshi nodu anoduje eyeru mu eka be mu maru lee-mechaa haa mu. ²⁰ Iphe, mu dobekporo enya dobeshia ya ike bya aburu iphe, mu ele enya iya bu le g'iphe aduhabe be mu ta abyadu emeru iphere nu onwomu l'iphe, bu iphe, mu eme. O chia iphe, obu eshihuje mu ike mu eme iya; mbu emekwa iya eme iya nta-a ge mu shi emehawa iya; bu le mu e-gude ndzu mu g'o ha ekutse Kereshi; ?o bu mu le ndzu? ?o bu mu lonwu?

²¹ L'ehu nkemu be bukwa; mu nodu ndzu; mu anodoru iya Kereshi; teke mu nwuhuru anwuhu; ono a-buwaruro urwu gbaaru mu. ²² Obenu teke o bu le mu no ndzu l'eli-mgboko-a be mu a-ka ejetaru Kereshi ozi; oo ya bu le mu ta maedu ophu mu a-hata. ²³ Uzi iphe labo ono be mu pfuru l'echi. Ephe tuko alo mu ibekeboebo. Ole ophu egu iya agushi mu ike bu ge mu laa lapfu Kereshi ge mu l'iya nodu. Ono ka mu ree okpobe akaka. ²⁴ Obenu l'o kakwanurupho unu ree okpobe akaka ge mu nodu ndzu swibaaru unu. ²⁵ Eshi ophu o doru mu enya egube ono be mu maru le mu a-nodu-a ndzu nodu swiru unu g'unu ha; yetajeru unu eka g'ehu-utso

unu akabaa shi, bu iya bu ehu-utso, shi lekmeta unu. ²⁶ Oo ya bu; teke mu l'unu noephe ozo g'unu a-kabaa enweru iphe unu a-zobe gude mu abaa; eshinu mu l'unu tukoru buru ndu epehe le Kereshi Jizosu tugbaru buru nanu.

²⁷ Oe g'o duhabe; unu mejeekwapho umere, gbaru onye anu ozi-oma ke Kereshi ono; oo ya bu g'oo-bukwanuru: mu -du ike bya ndu unu; ozo le mu ta aduhedu ike bya; mu anule-a l'unu gude obu lanu pfuru pfushia ike; anukwapho l'unu ese iswi ekwekwe ono, unu kweru k'ozima ono. ²⁸ Unu te ekwekwa g'o duru iphe, ndu opfu unu e-gude yee unu ebvu ilile. Oo iphe ono l'e-goshi phe l'oo epehedua l'emechaa laa l'iswi; unubedua a-buru ndu aa-dzota. O buru Chileke a-tuko iya mekota. ²⁹ Kele unubedua be Chileke mewaru g'unu kweta ke Kereshi; wafua g'unu jeje iphe-ehuka l'opfu ehu iya. ³⁰ Nta-a be mu l'unu gbaakwa mgba alwu ogo ono, mu shihawaa alwu ono, bukwa iya pho be mu alwu nta-a. Teke ono, mu shi alwu iya ono be unu gude enya unu huma iya. Oe nta-a buwaa le nchi be unu anu iya.

Anwu aka Kereshi

2 ¹ Oo ya bu; ekmeta unu kwetaru ke Kereshi; ?o meru obu shihu unu ike to? Obu ono, o yeru unu ono ?l'o duje-a unu obu? ?Unu le Unmedu-Nso tugbaru-a buru nanu? ?Unu emejeru-a nwibe unu odoo? Mbua; ?unu aphujeru-a nwibe unu obu-imemini? ² Oo ya bu; unu mee g'ehu tsoo mu utso tsofu mu iya l'ishi. G'egomunggo unu bujeerupho nanu; n-yemobu unu aburu nanu; obu unu me uche unu abukwarupho nanu. ³ Unu ta akpajekwa enya l'iphemiphe, unu eme. Ophu unu ekujekwa onwunu iphe, unu ahadu g'oo ya l'iphe, unu emekpo ememe. Unu wozeje onwunu ali l'eka nwibe unu no. G'onnyemonye rijeephe l'iphe, gbaru k'ememe bu g'a ka akwabewibe iya ubvu; eme le yebedua. ⁴ G'o to dukwa g'unu ha onye buephe iphe, a-duru iya le ree be onoduje acho kpurumu; o kwa g'onnyenonu chojekwa iphe, a-duru ndu ozo le ree kwapho. ⁵ G'uche unu yee ke Kereshi Jizosu bujeru iphe lanu.

⁶ Jizosu be shiepho le mbu
dwepho ge Chileke du.

Ophu o dudu teke o
rijeru l'adudu ono o
du ge Chileke ono be
ya tee wofubaedu enya.

⁷ O chia iphe, o mechiaru
bu l'o meru onwiya
onye adudu iphe, o bu;
bya eworu onwiya
mee nwozi.

E mee ya ọ bọru nemadzụ.

8 Eshinu e meru iya ọ
bọru nemadzụ;
bẹ o wozeru onwiya ali;
bya ekweta anwụhu;
mbụkwa anwụhu
k'eli oswebe.

9 Noo g'o gude Chileke
wolikwanaa ya eli;
ọ kakọta iphemiphe l'eli.

Ọ bya agụa ya ẹpha,
kakọta shii l'iphe,
bụ ẹpha, aazajẹ azaza;

10 k'ọphu iphemiphe,
dụ l'imigwe;
mẹ ọphu dụ l'eli
mgboko ọwa-a;
mẹ ọphu dụ lẹ mkpula
ali a-buru;
ẹphe -nụmaepho ẹpha
iya ono;
ẹphe egbushi ikpere;
baarụ iya ẹja;

11 waa k'ọphu onyemonye
e-pfu iya hoo haa
l'ọo Jizọsu Kéreshi bụ
Nnajiuphu;
shi ẹgube ono kwabẹ
Chileke, bụ Nna ùbvù.^a

Aburu ìphóró, dụ l'ọchii kẹ mgboko-a

12 Ọo ya bụ; ndu mu yeru obu; teke mu l'unu shi nọdu bẹ unu shikpọe-kwapho anuru mu opfu. Unu kabakwaa mu anuru opfu nta-a, mu nọ unu ụzenya-a. Unu gude ndzụ-agugu mẹ ẹhu-anmanma; meje g'a maru l'adzo-tawaru unu. 13 Noo kẹle ọo Chileke bẹ bụ onye ereshi ire ike l'ẹhu unu. Ọo ya emeje g'unu chĩa idzù mee iphe, dụ iya ree l'ọkpoma; mee ya g'ọ tọberu.

14 Sụ-a; iphemiphe, unu eme; unu ta agujekwa aphụ me iya; ọphu unu aọ-jekwaru ntumego ye iya. 15 Ọo ya bụ k'ọphu unu l'a-buru ndu adukpodaa iphe, aata unu ụta iya; unu aburu ndu dọbe ree; tẹme unu abukwarupho

^a 2:11 Gūnaa Azá 45:23.

unwu Chileke; ndu adudu iphe, ephe gude merwushia onwophe l'echilabo ejo ogbo-a, egomunggo swehuru; teme ephe nodu anoduje eme ejo ememe-a. O buru l'echilabo phe be unu no egbu nwiinwii g'iphoro le mgboko-a; ¹⁶me unu -gude opfu ono, lanu ndzu ono ewopfu phe. Oo ya bu ge mu enweru iphe, mu e-gude eku onwomu mboku ono, Kereshi a-bya ozo ono; k'ophu oso ono, mu agbakpoo ono me akanya ono mu ese ono taa buduru mu ola-l'iswi.

¹⁷Ophu o dukwa me obetaru e gbua mu gbashi mee mu l'ekweta, unu kwetaru waa l'ozu unu eje be ehuru a-nodulekwa-a atso mu utso; mu l'unu atukolea ete eswa. ¹⁸G'o bukwarupho nno bu g'ehuru l'a-nodu atso unube-dua utso kwapho; mu l'unu etekwapho eswa.

Timoti yee Epafurodayitosu

¹⁹Mu arikwa le Nnajiuphu, bu Jizosu eme mu-a ge mu zia Timoti g'o bya agbaphee unu; k'ophu o-bya akooru mu g'unu eme ala; gude dua mu obu. ²⁰O to dukwa onye ozo, mu nweru, du ge Timoti, bukwanu onye oriri ehuru unu echije ehuru. ²¹Ndu ozo g'ephe ha be abujeerupho oriri ehuru phe be echije phe ehuru. Ophu ephe aru-vujeedu iphe ophu buwaa ke Jizosu Kereshi l'oriri. ²²Obenu le Timoti be unu mawaru-a l'o goshiwaru onwiya le ya bu onye gbaru g'e gude ire iya aka. Kele o shi teke ono ejeru mu ozi ge nwa ejeru nna iya le k'ozu-oma ono mu l'iya eje ono. ²³Oo ya bu le mu arikwapho le mu e-zi Timoti ono ibe unu egwegwa me mu -bebeepho maru g'oo-mechaa nwuaru mu. ²⁴Teme mu gudekwapho Nnajiuphu aka l'o to dudu ge mu an-beru; mu abyawaa agbaphee unu l'ishi onwomu.

²⁵Mu byakwapho aria le mu zifutaje Epafurodayitosu, bu nwune mu bya aburu onye mu l'iya tukoru eje ozi k'alwu ugu ehuru Kereshi ono; bukwarupho onye ono, unu ziru g'o wotaru mu iphe ono, mkpa iya shi duru mu ono; g'o bya ndu unu. ²⁶Noo kele oghoroko unu g'unu ha be shiwaa uzanya duta iya; mbu l'o shihawaa uzanya tsuta iya l'ehuru l'unu numaru l'iphe shi eme iya. ²⁷Iphe shikwaa eme iya eviya; k'ophu o ghuduru nwanshi me o nwuhu. Ole Chileke phuru iya obu-imemini. O to budua yebedua nwekiya be o phuru iya. O phukwaru iya pho mbedua; o-buru-abu me aphu atso mu ishi labo. ²⁸Oo ya bu l'o gbenu ka mbedua ehe ihee ge mu zikebe iya g'o bya g'unu l'iya kwee; k'ophu ehuru a-tsokwanu unu utso l'unu gude enya unu huma iya ozo; ge mbedua agbabuhukwanuru iya egomunggo. ²⁹Oo ya bu; unu gude ehuru-utso gbobe aka labo nata iya okpobe anata; l'o bu nwanna, unu l'iya me Nnajiuphu tukoru tugba buru nanu. Unu kwabejekwa iphe, bukpo ndu du ge yebedua ubvu. ³⁰Noo l'o phoduru nwanshi me ishi iya abaa l'eje ozi Kereshi. O mia enya le ndzu iya; emeru mu iphe unu gege anodu emeru mu.

Okpobe apfubekoto

3 ¹Su-a; aka mu a-suberu iya unu ishi; unwunna mu; bu g'unu nodu Nnajiuphu l'ime tee eswa. O to tsukwa mu l'ehuru edephuru unu iphe,

mu dehawaru azu; noo kele oo-me g'unu kabaa egude eka l'iphe, mu pfu-hawaru unu ono. ²Unu kwabekekaru ndu ono, bu nkuta ono enya; mbu ndu ono l'anoduje eme ejo ememe ono. Unu kpakwaru phe l'aphara; mbu ndu ono, ekebutaje nemadzu ekebuta g'o bua ubvu ono. ³Kele oo anyi-bedua buru okpobe ubvu; mbu anyibe ndu gude Unme-du-Nso abaru Chileke eja; teme anyi nodu anoduje l'eka Kereshi Jizosu ete eswa; ophu o dudu iphe, anyi guberu iphe, eeme l'anu-ehu.

⁴Ome oo iphe, eeme l'anu-ehu adzoje nemadzu me o buru mbedua gege asuje l'oo ya a-dzo mu. O -buru l'o egube nemadzu onye bu l'adzoje iya; me o -buru mbedua gege enwechiaru iphe, mu g'a-zobeje su l'oo ya l'a-dzo mu. ⁵Noo l'a nwuru mu; mu nepho abali esato; e bua mu ubvu; mu buru onye Izurelu gedegede; mu buru onye okpa-ipfu ke Benjiaminu. Mu bukpo onye Hiburu; mbu okpobe nwa, ndu Hiburu nwuru. A -bya l'eme iphe, ekemu ndu Jiu pfuru; mu buru onye Farisii. ⁶A -bya le k'iphe, aphu lehu be mu shi buru onye achi nta Chiochi. A -bya le k'iphe, ekemu pfuru su l'oo ya bu onye -meru iya nu; onye ono aburu onye pfuberekoto; ono ta adukwa ophu aata mu uta iya le mu mesweru. ⁷G'o duhabe; iphemiphe ono, bukota iphe, mu shi anoduje ari l'oo iphe, a-baru mu urwu ono be mu gudeakwa iswi ehuru Kereshi wofukota enya; guru iya ye l'iphe, bu mu iphe, ola-l'iswi. ⁸O to budua iphemiphe ono; iphemiphe ozo be mu tukokwaru gukota l'iphe, tukoru buru mu ola-l'iswi; kele urwu ophu rwuberu mu eka, bu ophu nyiberu g'atu onu iya, be bu Kereshi Jizosu, bu Nnajiuphu mu ono, mu mawaru majia enya ono. O buru l'iswi ehuru iya be mu gude wofukota enya l'iphemiphe, mu nweru g'o buru iphe, iyi yifuru. Nta-a be ephe bukotawaa ntụ ekpofu lenya mu; k'ophu bu l'o buepho Kereshi be bu urwu, mu e-rita nwekinyi iya. ⁹Me k'ophu mu e-goshikwanu le mu l'iya tugbaru buru nanu. Ophu mu emeudu g'a suje le mu bu onye pfuberekoto, bu ophu shi l'eme iphe, ekemu pfuru; o buwaru ophu shi lekmeta ke Kereshi. O buru ono bu apfubekoto ophu shi Chileke l'eka bya eshikwapho l'eka ke Kereshi. ¹⁰Ge mu amaru iya; maru ike ono o gude shi lonwu teta dzuru ndzu ono; me ge mu le Kereshi obu atuko gbaru mgba l'iphe-ehuka ono, o jeru ono; me ge Chileke emee ge mu du ge Kereshi l'anwuhu ono, o nwuhuru; ¹¹k'ophu bu le g'o duhabe mu eshi lonwu teta nodu ndzu.

Agba oso gbafu iya l'ishi

¹²Iphe, mu epfu ta abukwa l'o rwuwaru mu eka erwurwu; ophu o bukwa le mu dukotawaa ree; ole iphe, mu anoduje adzobaa bu ge mu nata obunggo oso, mu gbaru; eshinu Kereshi Jizosu natawaru mu mee mu buru nkiya. ¹³Unwunna mu; mu ta asukwaru le mu natawaru obunggo oso ono; obenu l'iphe lanu, mu emejekpopho kpurumu bu le mu atukoje iphe, mu towaru azu zohashichaa kukebeepho ehuru agba agbapfu ophu no

mu l'uzo iphu. ¹⁴Mu anɔduje adzɔ gɛ mu gbafu ɔso ono l'ishi; k'ɔphu mu a-nata obunggo, bu iya bu ndzɔ ojejoje ono, Chileke shi l'ɛka Kéreshi Jizɔsu kua mu gɛ mu bya anata l'imigwe ono.

¹⁵Ɔo ya bu; g'iphe, bukotakpoo anyibe ndu kawaru ɛnya l'iphe ke Chileke bukwarupho egube iphe ono, mu arɔ ono be ephe l'a-nɔduje arɔ. Ɔ-bukwanuru l'o nweru g'o du; unu haru arɔ iphe ɔzo be Chileke e-goshikwa iya-a unu g'o doo unu ɛnya. ¹⁶Ɔo ya bu le-a; eshinu anyi gbawaru ɔso ono gbarwua ya l'ishi; g'anyi mejeekwapho iphe ono anyi mehawaru ono.

¹⁷Unwunna mu; unu tuko g'unu ha meje gɛ mu eme. Anyi egoshiwaa unu iphe, unu e-meje. Unu tuko nwutaepho ɛka ndu ono, eme iphe ono, anyi egoshi unu ono. ¹⁸Mu pfuhawaru unu iphe-a ugbo olemole; nta-a be mu gudeakwaa ɛnya-mini ɛkwa epfuphuru iya unu azu; su l'o nweru ikpoto ndu umere phe egoshi l'ephe bu ohogu oswebe Kéreshi. ¹⁹Ndu ono e-mechaa laa l'iswi; keke ɔo iphe, a-la phe l'epho bu chi phe. Ɔ buru iphe, iphere iya gege aduje phe be ephe egudeje aba l'abaa. Ɔ buerupho l'iphe ke mgboko-a be ephe woru uche phe dobe. ²⁰A bya abya l'anyibedua; ibe k'anyi buru imigwe. Ɔ buru l'ɛka ono be Onye-Ndzɔta anyi ono, anyi ele ɛnya iya eleshi iya ike ono e-shi bya, bu iya bu Nnajiuphu anyi, bu Jizɔsu Kéreshi. ²¹Ɔo ya bu onye l'a-gbanwe ogwehu anyi-a, adudu iphe, ɔ bu-a; mee ya l'o du g'ogwehu nkiya, l'egbu nwiiinwii. Ike, oo-gude mee ya bu ike ono, o gude emekota iphemiphe g'o lwa iya le mkpula ono.

Iphe, gbaru ndu ke Kéreshi l'ememe

4 ¹Ɔo ya bu; unwunna mu, mu yeru obu; unu pfuru pfushia ike l'ɛka Nnajiuphu. Oghoroko unu egbukwa mu egbugbu. Ɔo unu bu ehutso mu; ɔ bukwarupho unu be bu obunggo, mu e-gude aba abaa. Mu yeru unu obu shii.

²Mu arwo unwanyi labo ono, bu Yuwodiya yee Sintiki su g'obu buru phe nanu l'ɛka Nnajiuphu. ³Teme gubedua kwapho, bu okpobe onya; mu l'iya tukoru eje udu ozi lanu; mu arwokwa ngu pho su g'i yejeru unwanyi ono ɛka g'ephe meje iphe ono, mu suru g'ephe me ono; noo l'ephe sekporu akanya ezikashi ozi-oma ono; mekpoo Kelementi yee ndu ozowaro, bu ndu anyi l'ephe jegbaru ozi ono; bu ndu epha phe dukota l'ekwo, Chileke deshuru epha ndu a-no ndzɔ ojejoje.

⁴G'ehu tsojeepho unu utso l'ɛka Nnajiuphu tekenteke. Gɛ mu pfuphu-kwa iya azu ozo; g'ehu tsojeekwapho unu utso.

⁵Unu meje iphe l'orwuberu iya gude goshije ndiphe l'unu bu ndu obu oma. Nnajiuphu noakwa ntse. ⁶G'o to dukwa iphe, unu e-jeje ayoshi iya. Iphe, unu e-mejehia bu g'unu pfujeru nu Chileke gude kajeru iya iphemiphe, mkpa iya duru unu; unu ekelejekwa iya pho ekele. ⁷Ɔo ya bu; g'ehu-guu ke Chileke, bu iya kwata dakiri gɛ nemadzɔ e-gude uche iya

maru; aburu iphe, e-wota obu unu me uche unu kwachia l'ime Kéreshi Jizosu.

⁸Èka mu l'a-sùberu iya unu ishi unwunna mu bu; g'iphe, l'e-shitajee-pho unu l'uche buru oriri k'iphe ono, bukota okpobe-opfu ono; me iphe, bukpo iphe, gbaru ke g'e yeru iya ubvu; me iphe, bu iphe, pfuru oto; me iphe, bukpo iphe, e te merwuduru emerwu; me iphe, bu iphe, du ree lenya; me iphe, onu tukoru wukoo nanu lo dukota ree; me iphe, du ubvu; mekpoo iphe, bu iphe, aaja ajaja. ⁹Unu meje iphemiphe ono, unu nwutaru le ndzu mu ono; mekpoo ophu mu ziru unu ezizi; unu emekwapho iphemiphe, unu numaru mu lonu; me ophu unu gude enya unu huma lehu mu. Oo ya bu; Chileke ono, emeje g'unu buru guu ono eswiru unu eswiru.

Polu ekele ndu Filipayi ekele ke ree, ephe meru iya

¹⁰Su-a; eh u atso mu utso l'ime Nnajiuphu; kele nta-a be unu byawaru bya emeaharu mu ree ozo. Iphe, mu epfu ta abukwa l'unu ta anodujedu epfu opfu eh mu; o chikwa uzo te eshidu adujeru unu g'unu mee ya leka. ¹¹Mu te epfukwa lo nweru iphe, uko iya duru mu; le mbedua nwutaa-kwaru g'iphe, mu nweru go hahabe phujeru mu lenya; mobetaru o nodu anwuru mu inwuagha. ¹²Mu maru ga bujeru onye ejo eka duru; bya amaru ga bujeru onye nweru iphe. Liphe, bukpo eka mu no be iphemiphe ono mewaru mu; ebe o duedu iphe, abujekwaduru mu enya-aphapha lehu nkemu; mbu le mu rijiru epho; ozo le mu no egu; ?mu nweru iphe; me mu te enwe-o; mu ano-kirishilekwaa. ¹³O to dudu iphe, mu ta adudu ike emekota; noo loo Kéreshi be bu onye emeje ike adu mu k'ememe iya.

¹⁴Su-a; unu nweru obu oma leka mu no; yetaru mu eka teke ono, mu shi eje iphe-ehuka ono. ¹⁵Tem unube ndu Filipayi lonwunu maru le teke mu watakporu ezi ozi-oma ono le mbu; ge mu lufutaru le Masedoniya be o to dudu Chiochi ozo, mu lephe tugbaru nanu; gbahaepho unubedua kpurumu: oo unu bu ndu anuje mu iphe bya aburu unu bu ndu anataje leka mu. ¹⁶Mbu je akpachakpo le teke mu no le Tesalonayika; unu shi emejeru mu mkpa; me mkpa byaru mu; mbu ebe o bukwa ugbo lanu kpu be unu meru mu iya. ¹⁷O to bukwa iphe ono, unu anuje mu ono be mu ele enya iya; o chia iphe, mu ele enya iya bu g'urwu gbaaru unu berebere. ¹⁸Mu natakotawaru iphemiphe ono, unu nuru Epafurodayitosu go wotaru mu ono. Oo-sukpokwaaru iphe, mu eme iya tsufu etsufu. Iphe ono be unu vuru nu iya k'anyinyi. Iphe ono, unu nuru mu ono du ge ngweja, eshi kweekweekwee; ngweja, mkpo iya akpu tuuu alapfu Chileke. Mkpo iya ono atso Chileke utso; k'ophu o goberu eka labo nata iya. ¹⁹Le Chileke mu anukotakwaa unu iphe, bukpo iphe, mkpa iya duru unu. O buru l'iphe o nweru, odu-biribiri iya dakiri atu onu iya ono, shi leka Kéreshi Jizosu ono be o-shi mee ya. ²⁰G'o buru Chileke ono, bu iya bu Nna anyi be ajaja l'a-buru nkiya jas le tuutuutu le mimiimii. Nokwa go du.

Ekele mkpochi-ishi

²¹Unu keleru mu iphe, bu ndu-nso l'ehu l'ehu; mbu ndu ono, no l'eka Kereshi Jizosu ono. Unwunna anyi ndu mu l'ephe no l'eka-a l'ekelekwapho unu. ²²Iphe, bukpo ndu-nso, nokota l'eka-a g'ephe ha l'ekelekota unu-o; kekele ke ndu bu l'ibe eze nnajioha, bu Siza. ²³Ge Nnajiuphu, bu Jizosu Kereshi meeru unu eze-iphe-oma-o. Nokwa g'o du.